



Касапсайн олңа этам ханты пох

Ун кер тылац хусмет хатлатан Екатеринбург вошан «Наследие Урала» рут мир думтам сох па хорамат эталтаты уйтантопса ус. Хон мувев арсыр мув суңат эдты нялъяң тус ёшаң хоят там касасая яха ёхтыдыс.

Верантты мохет кутан ханты хоятэв па ус, щит Сергей Валерьевич Аляба. Дув Пулңават вошан округ верантты хотан рупитал. Юх, лов, карты па оңат лов эдты пуклайт, лыптит, хорат эвалат. Няврэмат па мойң хоятат самаңа верты верала уталтал.

«Муң талдан партсаюв, рупата сахат, там касасая заявка нэпек ханштыя. Ун кер тылац олаңмет хатлатан айкедан ёхатсайм, пирыты ят сохнам юпийн, Екатеринбург воша вохсайм. Щита ма «Там йисан сох пидан тайты хорамат» номинацияйн кассам. Касасая, ма верам рупатайдам эдты, ёх хоят антапкедат тутдысам па нёхты хор альсам. Ар мир хоятат педа потар тусам, хоты ханты ёх хоятдув катра пора эдты ин там хатлат унты антапкедат тайдат. Хой муй щиран хораматдалды, муй хорпи лыптан па анщаран пондалды. Антапкед хоща муй па ул, па муй кеша щит верда, щит эдты потарсам.

Рупатайдам эталтамем порайн, манэм нял айдат пох нётас. Хораманэ эвтам антапкедтам думатман, лув сцена хуват шушилдысат. Нётам няврэмата ун пумащипа ясаң китдам.

Там касасайн олаң тахая этсам. Дыпеман шеңк аматсам. Верам пормаслам тус ёшаң волаң хоятатан



Хор: Сергей Аляба



кащадасайт па ишаксайт. Рупатаем хоща щит ищи ям вер», – мойлапса щитам, тус ёшаң ханты похев ястас.

Зоя Куртямова ханшам потар



Хор: Иван Сандрин

Ляльн нох питам хатла хоралты ишнет

Там патриотическая акция Хон мувев ловатан кашң тал Волаң Ляльн нох питам емаң хатл кеша лэщатыда. Мет олңа лувел 2020-мет талн пунпса, хун мир ловатан коронавирус муш ураңна ким этлыты ант рахас.

Тампуш «Окна Победы» акция ун кер тылац 16-мет хатл эдты Ас нопатты тылац 9-мет хатл унты понман ул. Щи хатлат сыс

ишнета хорат па лыптит понты мослат. Хой опращдал Волаң Ляльн усат – лув хордал ищи рахлат ишния аймты.

Щиты, Охсар вошаң ашкуда няврэмат ишнилал хораманэ версалдал. Хой холна ишнилал ант хорамдыслад – акцияя пидтащияты, Волаң Ляльн юр понам хоятат нумадмияты!

Иван Сандрин ханшам потар



Хор: Зоя Куртямова

Ялап хотат энамдат



Хор: popovolegshur

Хащам вет талд сис яма ныла, хоты шоши муеван, ун воштан па куртан ялап хотат омасдайт. Катра я ювам хотат нох лосытдайт. Ар тал ермат, ай хотатан улам хотат ялап, дащкам хотата касадат.

Ун кер тылащ 2026-мет тал элты, округ хот маты програм- майн ялап щир этас. Хой округ тумпийн хот тайл, щитат, елпи

хот ант тайм хотат пидан, хот лутты охан ищи сохататы питдайт. Хой хот хащам вет талд сис хот лутас, тыныйс, мосящ па ел мойлас, щимащ хотат ищи тамащ нэтапса вуты верытлат.

Там щутщаты хат- латан округ кущаев Пулдават вош кущаев пидан хот ома- сты харат вантты янхсащан. Мир нэмпи вошхулы хоща, катра кат ятпи паварт хотат лосытам тахайн,

кев элты, лапат ятпи хот вер- ты етшаптада. Луң сис, катсот педа яртъяң хоттэл ялпа омп- сам хота лоңал.

Лапатнаңк вош ищи ялап хо- татан энамал. Там ванан айкел ёхтас. Ханты хотлудв кутан, хулам хоттэл катра хотдал элты ялап хота касадат.

Мужи вошев ищи ялпидыйл. Социальной сетьяна хорат пон- тыйн, ханты хот венш хорас каншлудв. Там ванан Надежда Миляхова (Сухарина) ищи ялап хот томан нялам ёша пайтас. Муң па лув пилэдан аматлудв.

Вошлудв, куртлудв уна ат энамдат. Тэдыя хошам, хорамаң, дащкам хот ат омасда. Ханты рут мир хотлудв кутан, аршак хот хот томан нялам ёша ат паятал.

Зоя Куртямова
ханшам потар

9-10 тал



11-13 тал



14-16 тал



Ухал шоппи наварсат

Хащам лапат щутщаты хат- латан Охсар вошна касася ма- нас. Овс мув шимлаң рут мир касася щирн энамты няврэмат ухал шоппи наварсат.

Кев сыд районан «Полярный медведь» нэмпи касты ашкуда ул. Вошаң па куртаң няврэмат уталтыты сис тохи янхлат. Хащам касасяин эталтысат,

хоты лув ухал шоппи наварты уталтысат.

Ёх няврэмат 9-мет тал элты па 16-мет тал ловат унты ка- сапсая ханшлтантысат. Хорн

вантадан хоты касам щирн ме- стайт питсат.

Шеңк ям па умащ вантты, хоты энамты няврэмат касты янхлат па лувилал эталтылдал. Щиты лув

вещкат, ошаң па тумтак хоттата энамдат. Ат па елды тумтака уталтылдат па касты лойдылат.

Иван Сандрин ханшам потар



Хор: vk.com/vpriuralye

Муев сайлаты таксар ху

Там ванан Асов куртаң няврэмат Виктор Алексеевич Михайлов пидан уйтанысат. Лув СВО хар элты, каматса хатла ёхи ёхтылдыйс. Виктор Алексеевич ищи Асов куртан энмас, куртаң ашкудайн уталтыйс.

Солтана янхмал юпийн, иса щита, рут мувал сайлаты ха- щас. 2011-мет талдан ГРУ специ- альной назначения волаң 24-й атэл гвардейской бригадин солтан щира рупитас. Щи нэмпи подразделенияйл мув сайлаты хотатан шеңк яма уйтла, Жу- ков нэмпи мевал посан па «гвар- дейской» нэман юкантман ул.

Юхат Виктор, Крым мув сыд па Сирия мув лялясты харатан ус. Щалта па СВО нэмпи хара

муев аратыты манас. Мевал мевал посатан артан понман ул: Суворов па Жуков нэмпи мевал посан, «За воинскую доблесть» олаң па кимет степень, «За боевые отличия», «За службу в спецназе» па хорпи отат па.

Луң ёхи соханман, няврэмат хулантсат, мув щиран там йисан ляль харан лялясда.

Муй хорпи пошканат, нёлат, тохнапты хопалэт, машинайт улдылат. Хоты там йисан мет такан, хот такды янхты тохлаң пормас, тайла. Муй щиран лув рупитал? Муй щиран лув вер- ман ул? Энамты няврэмат иса инщасат.

Муң па Виктор Алексее- вича ясаң китлудв: «Тумтак

ула, дылэн шавии. Номпсэнан иса нумман таи, аңкенан, рут хотлданан, куртаң мохилданан иса ёхи давалдайн. Турмен сы- стам ат ул, манты юшен туң па пайды. Талаң ёш, талаң кур, елды педа».

Зоя Куртямова
ханшам потар



Хор: admnuji.yanao.ru

Мет олңа ёхатты леккарат емаң хатл



Ун кер тылац 28-мет хатадн мушаң хоятат хоца сора па мет олңа ёхатты леккар хоятат емаң хатлэл постасэл. Кашң ун вошан, ай куртан си хатадан хоятат яммалты ёх ям ясаңан ястадайт, ишак нэпекан юкантидайт, мойлапсайн мойладайт. Там хатл 2020-мет тал элты постаты питса, ши ураңна Владимир Путин нэман Партапса ханшас.



Муң шоши ханты хоятлүв ици Скорой помощь хоца рупитлат. Хоятат уншак па айшак леккарата, хоятат леккара нётты нэңата па потаргы хошап хуват айкед вуты хоятата юр пондат. Ёх па санитарата, па машина сэвс тайман нётлат. Лүв ияха мет олңа нётап тувман иса ёхатлат.

Хоятата нётты рупатайл самаңа тайдалды

Пулңавт вошаң ёх лыд шавиман 64 хоят рупитлат. Ши куртан Алексей Леонидович Пырысев ул. Кашң рупитты хатадн лүв 15-кем пуш хонцапса ятам мохет яммалты яңхал.

– Ай порайн хун худдыты нёңхалан питылысайм, нумасам хоты щимащ муш хонцапса этад па холща ёхатал, – реаниматолог нэмпи леккар Алексей Леонидович ястал. – Еша

унашак энамеман, так номас понтсам, леккара уталтыты манты па хоятат яммалты.

Ашкуда юпийн, лүв Пулңавт вошан леккар педа 4 тал уталтыс, елды па холдна Тюменской государственной медицинской академиян 7 тал хащас. Щалта мохты, Надым вошн, реанимационной бригада хоца рупата ятас. Каматса тал хащаман Пулңавта манас. Щита, 2008-мет тал элты, инты унты хоятат яммалман рупитал. Аратл, лүв хус молтас тал самаңа тайты рупатайл елды тул. Яң молтас тал лүв леккар-реаниматолог щиран мет ун категория тайл.

– Хоятат лыд яммалты па тумтака пайтты ураңна рупатаем самаңа тайлдем, – ханты



Хор: Алексей Пырысев



Хор: vk.com/salekhard adm

Алексей Леонидович Пырысев

леккаре потарл. – Кенашк па тумтака питам хоятат манэм ханшлат, телефон хуват ям ясаң китлат. Щит сам дыпийн мет ям амтап, хун щимащ ясаң худлан.

Рутлал вер елды тул

Андрей Валерьевич Кельчин Лорвошн Ас потты тылацн 1980-мет талн сэма питас. Щита ашкуда етшаптас па армия солтана китса. Кат тал войска связи хоца ус, олңа Хон Петра



Хор: Андрей Кельчин

Андрей Валерьевич Кельчин

вошн па щалта Магадан воша китылыса.

Солтан элты ёхатмалн елды уталтыты номас понас. Ванты, лүв опилал леккар хотатан рупитлат. Щишан ши Пулңавта нэпеклал пилан манас. Медицинской колледж хоца худам тал уталтыс па 2004-мет талн фельдшер щира етшаптас. Ици талн Ныда нэмпи ай воша рупата китса. Худам тылац рупитам юпийн, Надым вош скорой помощь хоца вохса.

– Надым вошн ма лапаткем тал рупитсам. Хоятат яммалман, рупатаем шеңк самаңа тайты питсэм. Улапса кашң хатл хун йи хорпи, хой порайн муш хонцапса ёхатл, хой порайн атмаш


раканты верытла. Мет олңа муң ши ёхатлүв, – фельдшер Андрей Валерьевич ястал. – Елды улапсаем щиты манас па ма Ёмвоша касалсам. Щита 11 тал Центр медицины катастроф хоца рупитсам.

Кимет муван улман, лүв самалн ёхлы, рутлал улты мува талты питса. Лорвош районала, программа «Земский фельдшер» щиран, ёхтас. Ун кер тылац 2022-мет тал элты Мужи вош отделение скорой помощи хоца рупитал.



Иван Сандрин ханшам потрат

Хоты йис улапса нумман энамты няврэмата елды туты?



Уйтантопсая ёхтылдым хоятат.

Ямал мувев Законодательной Собрание хоца щит элды потарса. Щи ураңна, нэман «Историческое наследие Ямала: диалог поколений» нэмпи, потарты лот дэщатса.

Потарты па хулантты хоятат ар тахайт элды ёхатсат. Уншак хоятат потарсат, хоты мосад йис улапса нумман тайты па ант ёрэматы. Щи ураңна энамты няврэмат па айлат ёх мосдат ай пора элды уталтаты, ашкудайн йис улапса элды луңатты па вантопсайт альты.

Елена Дубкова потаргас, хоты дув айлат ёх пидан катра йис кев хорат сыстаплат па нох дэщатлат. Ольга Рябкова па «Некрополи Салехарда» нэмпи проект элды потаргас. Щи щирн дув Пулңават вошан катра хадащат хоца лоттам хоятат йи нэпека акатлат.

«Нумты, мосад нумты», – щиты Татьяна Гостюхина ястал. Дув потар верас, хоты дув уна ювам хоятат пидан Пулңават элды потрэмисат. Ханшсат, хоты самаңа тайты вошел ай куртые элды энамты питас. Щи тумпийн катра хорат моцатсат. Актам отдал йи лота акатсалдал па «Салехард. Воспоминания» нэмпи книга этас.

«Ямал мувев йис улапса нэпеката ханшман ул. Щи ураңна, 5 па 11-мет классатан уталтаты няврэмат ураңна нэман «История и культура Ямала» учебно-методической комплексат дэщатман улдат. Уталтаты хоятат ураңна щи нэпекат иса ияха акатман улдат. Па нэмодты каншты ант мосад, туп няврэмат вещьката уталтаты. Ин



Татьяна Гостюхина Наталия Фиголь элды ям ясаң нэпекан мойлаптаса.



муң нумаслуд хоты щимащ нэпекат дэщатты айшак няврэмлуд кеша, хой 1 па 4-мет классатан уталтыйл», – ЯНАО Законодательной Собрание Социальной политика Комитетан куцай улты нэ, Татьяна Бучкова, ястас.

Нэхты хор хуват Волгоград вош элды Александр Шлюшинский айкел китас. Дув «Ямальские герои Сталинграда» проектал элды



Учебно-методической комплексат понам луңатты нэпекат.

Надым, Новый Уренгой па Ноябрьск вошаң катра пормас шавиты хотат куца нэңат ястасат, хоты дув рупатайдал сахат йис улапса нумман тайда. Хоты Ямал мувев лыпи сорнет моштасайт па щи сахат, олңа, ай куртат этты питсат, ин па ун вошата энампсат – щит элды дув хоятата иса потарлат.

Ёхтам па уйтантыям хоятат йи номас понтсат – Ямал мувевна катра йис улапсайлуд нумман тайдайт, нэпека пондайт па елды энамты хоятата потартлайт.

Потар шупем ештаптаты утцилэм Китай мув ошаң мутрайң Конфуций ики ястам ясаңан: «Йи пуш хуллэн – холты

ёрэмалэн, сэман вант-лэн – нумты питлэн, наң ёшенан верлэн – оша пайтлэн!». Там ясаң щиран энамты ёх катра йис улапса нумман ат тайдэл па елды ат тулэл.

Иван Сандрин ханшам потар



Охсар вош элды ёхтылдым айлат ёх.

потаргас. Щи щирн дув айлат ёх пидан Волаң Ляльн тапам солтанат каншлат, нэмдал нэпека ханшлат па ялпа лоттатат.

«Диктант Победы» ханшсат

Там акция нэман, хащам Волаң Ляль нумты ураңна, лэщатман ул. Мет олаңан 7-мет хатл Ас нопатты тылаңи 2019-мет талн лувел ханшса. Ши порайн 74-тал Волаң Ляльн Нох питам хатл ус па 150 щёрас молтас хоят 24 па хон мув сыдат элты диктант ханшсат. Ши тал элты тамащ ханшапса кашң тал верты пйтса.

Ун кер тылащ 24-мет хатадн мир ловатан ханшапса лотат верыдысайт. Ай куртатан улты хоятат ищи ханшты омпыдысат. Лорвош район кашң курт элты Волаң Ляля хоятат маныдысат. Лувилал нуммалдмиман, 350 молтас хоят ханшты юх ёша вуйдысат. Аратл, район ловатан, 10 историко-патриотической акция ханшты лотат пуншилдысайт.

Диктант ханшам юпийн кашң хоят письмо ханшас. «Солтана ханшты письмо» нэмпи акцияйн, ун хоятат па ай няврэмие, ям ясчат нэпека понтсат. Кашң ханшам нэпек муң солтанлува китла, хой СВО нэмпи ляль хоща мувев аратыман рупитал. Ёдн лув шеңк такан рутдалан лавадлайт.


Иван Сандрин ханшам потар



Ма ясңем юраң па тащаң!

Там ванан Канащ куртан ун емаң хатл ус. Арсыр рут мират ияха уйтантысат па каш версат. Кашң мир ши хатадан аляс лув улапсайал элты. Ханты мирэв ищи: ар арысат, лэгот каварсат, яксат.

Ши хатадан хантылудв ялап айкел худсат. Ханты ясаң ин рахал мутра хуват уталтаты. Ин энамты няврэмлудв рут ясаңан волаң ант потарлат. Ар пелак аңкидал-ащидал пидан



ёлан рущ ясаңан потарлат. Ин там порайн энамты няврэмат ивеван мутра ещадт омаслат. Лув кутэдан волаңа хонна ант уйтантыдат, ант ёнтлат. Ши ураңан ханты няврэмат кеша приложение лэщатса. Щимащ номас па вер некоммерческой организация «На языке сердца» ус па верас.

«Ялап ханты посат» – щимащ проект этас. Муя па щиты аядса? Муң ханты алфавитэван тамащ ялап посат а, о, у, йа,



йя, йо, йё, йу, йў, йэ, Ыь, Ьь, Ёа, улдат. Щикуш ши посат анта ялпат. Ар пелак ханты мирэва ши посат яна ши ялпат. Ин кашң ханты верытал мутра хуват ши посат элты айкел худанты. Ханты алфавитэван хольмаң пела нийл (28) буква.

Приложенияйн ши ялап буквайт элты Светлана Ивановна Вальгамова потарлат. Щалта па мохты рахал потар шупат худанты па шиялаты, хоша мосад ши ялап посат ханшты. Приложенияйн арсыр партапсайт улдат. Потрат, монщат, амаатщет ханты ясаң щиран Любовь Возелова лэщатсалды. Кашң буква, потар, монщ, амаатщи кеша хор ул. Ши хорам па тус хорат Варвара Сермер (Тогачева) щуртас.

«Там приложение хуват ханты ясаңан уталтадан. Муң нумаслудв, щимащ приложенияйт шеңк мослат. Елды па номас тайлудв, хоты мосад па ямашака лэщатты», – Самира Евдокимова



Хор: Любовь Возелова

ястас. Лув мир рут ясчат кеша арсыр ям онтас верал.

Аңки-ащи ясңен елды туви. Ёис потрат, монщат, арат худанта. Пилдан пидан рут ясаңан потарта. Ханты ясңен ал ушты. Муң ханты ясңев тащаң па юраң!

Любовь Возелова ханшам потар

Сорашак айкел мощатты ураңан

«Лух Авт» газета кашң лапат йи пуш этдыйл. Тухал ишан, ёхаттал унты талаң лапат хащал. Ши веран, сорашак айкедат мощатты ураңан, нынан мосад «Лух Авт» поныдыты айкедат «ВКонтакте» па «Одноклассники» хоща мощаттыты.

Ши ураңан там QR-код мохты лоңаты, па муң верыдыты айкелдува ханшлтыяты. Кимет веран, айкел луңатты тумпийн, щита рахал ясаң ханшты, потран сама ки рахас – пос понты.

Муң па, нын вантам айкелдан элты ищи нопсэв тыед-тохел понылдылэв, вантлэв – мата айкедат па муй элты хоятат луңатты лаңхалат.

Тумтак ёшна, тумтак курна ханты мир улапсаев ияха понасман елды тулэв, ханты мир ясңев шавилэв!



ОБЪЯВЛЕНИЕ

Там QR-код хуват лоңаты па вантаты, муйсыр нётопсайт СВО хоща улты мохета малайт. Ши тумпийн нэңдала, няврэмдала, аңкидала па ащидала ищи нётопса вуты рахал.



СЛУЖБА ПО КОНТРАКТУ В ВС РФ

полная информация по телефону
+7 (902) 816-11-90
+7 (34922) 3-98-08
звонки по России бесплатны

ВРЕМЯ ДЛЯ ВАЖНЫХ РЕШЕНИЙ!

КОНТРАКТНАЯ СЛУЖБА
6 700 000 Р
ЕДИНОВРЕМЕННАЯ ВЫПЛАТА
4 000 000 Р

ПРИ ЗАКЛЮЧЕНИИ КОНТРАКТА НА ЯМЛЕ

Прибыльшим из других регионов возмещаются затраты на проезд от места проживания до г. Салехарда. В период оформления проживание в г. Салехарде и 3-разовое питание предоставляется бесплатно.

ОБУЧЕНИЕ:

- ✓ ОПЕРАТОРОВ БЕСПИЛОТНЫХ ЛЕТАТЕЛЬНЫХ АППАРАТОВ
- ✓ ТАКТИЧЕСКАЯ БОЕВАЯ
- ✓ МЕДИЦИНСКАЯ ПОДГОТОВКА

3 600 000 Р единоразово от региона
до 120 000 Р сертификат на обучение

400 000 Р министерство обороны
зачисление вольного срочника военного контракта

ЕЖЕМЕСЯЧНЫЕ ВЫПЛАТЫ ПРИ НАХОЖДЕНИИ В ЗОНЕ СВО **ОТ 225 Т.Р**

Масай ики

Моқи йыснэ тэм йавнэтнэ вълэм, тэм мэхэтнэ вълэм қантэх йах вичэ пэ авэс йахнат льяльэксэхлэт. Щи нөпөтнэ әй өрт ики вёл. Йэмаг тарэм ики вёл льяльэксэтэ вэрнэ-учнэ. Лүв анта, морт пэ төй. Панэ щи авэс йах пэлэм өт төппэ төт вёл. Щи қуи пэлмин, вёлэт. Щи қө вълмалнэ, вичэ йэмаг вёл. Вичэ пэ лүв щи қутңилнэ йавөлнат-һолнат йаңқиләл. Көчхинат йаңқиләл. Щиминт қутңилнэ вичэ пэ ләхрилнат-учлалнат вёл. Панэ щи қурһөвтынэ вёл, вёл. Әй мэта латнэ, анта, щи мэта авэс йахнэ, щи тарэм вәрәт қөлмин, әнтэ һөвалтәли. Лүватынам әнтэ йаңқлэт льяльхө-учхө. Лүв пэ әй ай-маққә вълтахө йөх.

Панэ әй мэта латнэ кивринам суч, әй мэта аләннэ. Панэ щи кивринам сочлал сохит, киврия әнтэ йөвөт, панэ щи авэс льяльнэ щи нәпты, щи вълтэ мэта пувләлнэ, қутәлнэ. Нһолнат льяктахө вәри. Щи һоләтнэ әнтэ қойли. Щи һоләтнэ, антәқа пә, әләпты мәнли. Антәқа пә, һоләт лүваты әнтэ йөвөтләт. Панэ пәрхинам күч аңкрәмтәх. Тәми, щи қутәл айнам махәлты вәйи, щи льяльнэ. Әйнам төвә ымләт. Панэ қөты йәл, сарнам мән. Панэ щи киврия йөвөт. Панэ киврия нәврәмәх. Киврия ылнам ләң. О, щи льяль йах, авэс льяль төвә щи киврия қырәмтәт. Щи киврия лирты аттал әнтәм.

– Йа, – йастәләт, нөмәқсәләт. Щит мет төхө йәңка мән әй пыхәр. Қөлнә лиләңкә йәл? Я, щи қутәлнам мәнәт.

Қутәлнә әй ими төй. Айәм-китәм ими. Щи ими авэс льяль өққөнә вәйи. Сөвлал-һурлал анта мүв мостә сөв-һур төй қутәлнә вәят. Вәли мүв арит төй, щи қаймәл панэ пә китат. Панэ щи авэс льяль мән, вълэм мэхәлнам. А щи авэс льяль мәнәм пырнә, анта мүв маһахө йөх, щи киврия нөқ



Хор: Людмила Айваседа

әт. Панэ нөқ кил. Тарэм төрәм вёл. Йәңкәп-сөвәп һырнат поттахө вәри. Нөмәқсәл: «А-а, нө ма имиләм төхө мэта вәр вәр. Мант мәнә әнтэ қытәлтәх». Қутәла мән.

Тәми қутәл айнам таләх. Сөв-һур әнтәм. Панэ щи ләйәлтахө ләкәт, ләйәлтахө вәр. А-а, щи авэс льяль йил пәләкнам мән. Нһувләм ләки тәми пәрхинам мәнәт. Щи ләк кат пәләккәнә сәр вәй. Сәр ли, мүв йух ли йәхтәх. Сәрнат пә льяльщқынтахө йөх. Щи мәнәм ләкнә. А-а, әй тохинә йәхтәх. Тәми, щи льяль лотәлтәм пунәң сөвәт-һурәт нөқ қын. Тәми, щи иминә щи льяльлөх йүтә маһахө, тәми, щи мәнәм ләк пәләка төвә қәһахтәх. Чөвәл өнта. Пунәң сөвәт төвә қыйи. Әс чымәл қыныхтәтәхө йөх. Пачәк тохинә. Тәми, әй тохинә нымәлхәл нөқ қын. «А-а, – нөмәқсәл, – мет өтәңкә щи йөхәм!»

Төл сохит өс мэта тохит қынәқсәх. Тәми, көчхил нөқ қын. «Вот, муй хорпи, ләксәмәңкә йөхәм», нөмәқсәл. Қынәхтәх, қынәқ-

сәх. Төп щи ләхәр вәхәл әнтэ йәхтәх. «Мет, – нөмәқсәл, – лиләңкә йөхәм». Төл сохит щи пунәң сөвәт-һырәт, имил чөвийәм, нөқ қын. Нымәлхән пул. Вәнтәр сөвли нымәлхәл. Көчхил вәй нөқ. Көчхил нөқ лөвөт. Панэ щи льяль пыри щи нүрәхтәх. Щи льяль мәнәм ләки.

Анта мүв арит қәтәл мән. Щи льяль вълтә тохила йөвтәт. Вълтә мәхила кирәхләт. Ну, льяль төвә кирәхләт, панә архә мәнәт. Ар вълтә тохила архә мәнәт. Вәли тас чөпәт архә вәйәт. Щи Масай ики вәлит. А, льяль өққө, һәләқмин, күтәсләтәхө раңипәх, қутәлнә. Нһүки қотнә вәлләт. Күтәсләтәхө раңипәх. Панә щи йиһмәт, йиһмәт. Әй мэта латнә виналал тәрмәт. Щи вәлтәлнә төвәнә вәләл. «Анта, – нөмәқсәл, – ма тэм ма щи Масай ики қәләм тохи әнтэ вүйәм. Төхә сәмты лиләң».

– Әй, – йәхәлнә вәрли. – Мақә мүв тохил лиләң? Щи йәңк өнта әйпа ләңәм өт. Лүв анта, төвә чикән.

Щи льяль өққө пәлмин вәләл. Щи ләхәр, Масай ики ләхәр, моләпси өвтийи, йәмхә моләпси йа ыл пәләка нөқ лөмтәмтәх. Панә щитәлнат әлал-омәсл. Щи ләхәрнат күтәсләл. Әй вичэ пә әнтэ вәйәхләтәх.

А-а, щи күтәсләтылнә, щи Масай икинә щи йөта йөвтәт. Щи вәлтә тохилнә. Мүв аләң ли йөвөт, мүв йөвин ли вәс йөвөт. Щи маңәт йәхтәх. Щи қотәт қонәннә қөләнтәл. Щи көллал-йасәңлал қөләнтәл. Щи күтәсләтә йах. Панә әй мэта латнә қөләнтәл: йәһтә өтлал тәрмәт. Виналал-учлал. Панә щи авэс льяль қотнә вәлләт, һүки қотнә, льяль өпи панә маһи. Авэс льяль өққө маһила йастәл:

– Нүң мәнә, лопканам йәңқила!

Авэс льяль өққө маһи вәли катәлтахө раңипәх. Панә авөл пул.

(Еллы па ул)

Аграфера Сопочина
ханшам потар

Ими Хилды па Охсар ики

Нюрам нохар юх унт сыдан ай паварт хотые омасал. Щи паварт хотан Ими Хилды имед ими пидан ул. Щи ху щикунш ай, велпаслаты па шеңк харси. Унта манал – антапкедал кат-хулам пуш лаңкиан па нёхасан тахардалды. Аса нык дэдал – сух, вунш нох талад.

Имед ими мохсаң шумах верты ант алэмал, сух вой папты ант етшал. Худы пайдал пидан хащ ши нох ныктала. Щишан, муй нёхтада – дэты кинца ар, муй нумалмада – молтас. Тада ювантыял, луң верыдыял, Ун Ас питаран кул восты пусаң щиты ши нохлы каварал.

Монц ху муй хув энмал, муй хув вормал? Пурдам вой кеман пора манал. Ими Хилды ун воя кетамты питас. Велпасал яма мантыян – потар паян омасал. Имед ими-ян щикунш водытыда, щиелт лув вер ант таял.

– Ма кемем юр антам, ма кемем апар антам, – нюхалты войдал педа увалтыял.

Йи ищки тал хатадан Ими Хилды велпасалд вантты шушмас. Вутаң дор кималан ун вурты Охсар шиялас. Юхдал нох сухтасды, пасты нёдал нох лакемасды. Воял хоца хухалмас. Унтар сохпат нымалңалад ал щелдаңан. Охсар икен еша аңкармияс – ел навармас. Ими Хилды юраң па апраң: ищи курмат наварты вой эдты ёхтапсалды. Нерасман, ващ туран ел арэмас: «Охсар ики – ваңкары, вой хун улдиымен, ёр хун улдиымен! Ма наңен шушман велдэм!». Щимащ яснат худмал юпиян Охсар ики ил опсантас. Турам педа щалта щалэмас, па этра тохрас! Щиталан, порхалд вана сухтаман, щалта сыхапсалды, туп донщ лакки подыял. Хуял ёхи ант хащал: унтар сох нымалңалад кутан-кутан донща ханамтылңан. Щи мандатан, щи мандатан. Камн дор шоппи вуншсаңан, камн нюрам шоппи хухалсаңан. Адаң хатл ус, етна пелка ювантыяс. Вурты най ил ханематы лотада ванамас. Щиталан велпас ху хулам вурпи пасты нёдал лакемас, арсыр юх элты сэвам так юхдал сухтас. Лаңкрал так, сэмал пасты.

– Там юхдэм сухтымем пораян, тохдаң вой ант маныдыяс, – щиты нумасман, Ими Хилды нёдал вощкасды.

Карты нёд, кушты вой туран ел кущалтас. Манмал итан Охсар ики пещ пелка хояс. Ин вой еша хащ роммияс. Нёдан хоям пещ пелкад талаңа нох лакнамтас, донщи юшан хащас. Ими Хилды вана ёхтамыяс, воял пещ пелак кимет нёдал юватсалды – воял лаңкар пелак менэмас. Вана рахамтыял – лаңкар пе-



кималдал ант хащлат. Шаңк йиңкдал нох муңхсалды, этам сэм йиңкдал пуңла вотэмасды. Воял пещатпорхат донща ил понтсалды. Хохтам турадан ар совал ел сухтасды: «Охсар ики, апраң вой, яна юраң улмен. Охсар ики, юраң вой, яна вура таймен».

Щиталан ёхлы карэмас. Охал эсадман, улты шошал педа шушмас. Унтар сохпат нымалңалад щи морт донща ханлат – шихаран нох сухталды.

Яна щи. Кашң вой ула

лак лума лукемасды. Па мандатан. Хулмет, нялмет, ветмет нёдан пещдал, дыйдал, самдал-мохалдал хол маншилаят, хол юшан хащсат. Ёлта хухалты хоятадан – хол нох акатсайт.

Рамкаты питас. Охсар ики тал охпушхал хащас: нохшак навармиман щиты ши дарыял. Ёхлы аңкармиталан, сэмңалад атам тутан сорылңан. Ванты, йи кула йис, вураял хун ил паятдалды. Щиты печарат улты Емаң дора ёхатсаңан. Охсар икен охпушхал верантыман, арсыра нянярдыман, Емаң дора нык дарыяс, щиты сэм элты пентас. Вой, ванты, охал ёша ант ки катадсэн – ант велмен хорпи. Печар дор – кашң велпас хоятан хуллиса: хутлаты унты щита дылаң луңхат духлатдат; дылаң меңкат кушлат, щалылат. Хоят дыл



Хор: Shutterstock

вуты отат тата энмидат, туташак вощамтылат.

Ими Хилды ил дояс. Щи воял вура ох питас. Па ки йи курам пурмал – нярэмала, дылаң тэдан ёхи дэвемид! Сохдал ант хащлат,

– атам ясаңан ант рахал ястаты, атам номасан ант мосал нумасты. Щиты хантэт ястатат: Турам вой?

Любовь Возелова нэпека лэщатам монц

Шимдаң мир хоятат емаң хатл

Ун кер тылац хольмаңмет хатадан Хон мувеван улты шимдаң мир хоятат емаң хатадан юконтсайт. Ин там хатл постаман ун вошатаң па ай куртатаң каш туты харат дарпитсайт.

Хашаң шутцаты хатлатан, Канац похадан, тэдыя арсыр мир хоятат яха актацсат. Хар тахайн омсам карты куратан хул па щанька шарытса, хул па нэхи дантаң путат кавартсайт. Тэдаң пасанат омассайт, тынасты харат дарпитсайт, ур хотат лыпия рахас лоңтыгы па пормас верантты уталтыгы. Няврэмат ёнтман хухатдысат, айдат ёх па касты харатан юрдаң эталтасат. Шимдаң мир хоятат лув думтам сохдал альсат, пасан тэд лэтотлдан емаң хатла ёхтам хоятат лапатсат. Кашң рут мир лув ардал арысат па яксат.

Юхат, ёш яха катадман, хатл манты щиран дарысат.

Каш альты но-раман, мойң па куртаң мохет ещалт, куца ёх мойлапса ясаң ястасат. Кашапсаятан нох питам хоятат мойлаптасат.

Паварт хот лыпийн ханты ясаң уталтаты ёнтты мутра эталтаса. Муй щиран ясаң ант уйтты хоята моштаты, маты ясаң муй щиран ястаты па оша пайтты, муй от элты потар манал, щит элты потар туса.

Щи тумпийн, ялпа этам луңатты нэпек «Ямальские лица Победы» хоятата альса. Водаң Ляль порайн лялясам



Хор: Зоя Куртямова

па рупитам хоятат нэмдал тохи ханшман улдат. Каматса ханты хоятэв элты потар щита па манал. Луңатты нэпекев ашкудайн уталтыты няврэмат кеша лэщатман ул. Щит ураңан книгайл анта



Хор: Иван Сандрин

шецк ун па луңатты кен. Уйтантопса етшаты елпийн, ой тайты вет хоят, ялпа этам нэпекан мойлаптасайт.

Ун кер тылац хольмаңмет хатадан Пулцават вош харатан тамац емаң хатл па ус. Рупитты лапат етшаты елпийн, хоятат каш вантсат, шушилдысат, рутдал пидан уйтантысат, щутцасат.

Сыстам турам идпийн, арсыр рут мир хоятат кутлдан, яма ат улдат. Мувев ит, Турмев па! Рут мир хоятат няврэмдал, хидыдал энмадман елды ат улдат, рут ясцел, улапсаел шавиман елды ат тулэд!

Зоя Куртямова ханшам потар

Газета

«ДУХ АВТ»

Адрес редакции:
629003, ЯНАО,
г.Салехард,
мкр. Богдана Кнуянца,
д. 1, каб. 106
+7 (34922) 4-68-63

E-mail:
luh.avt@yamal-media.ru

Учредитель

Департамент внутренней политики
Ямало-Ненецкого автономного округа
(629008, ЯНАО, г.Салехард, пр-кт Молодёжи,
д. 9, каб. 708)

Газета зарегистрирована

Управлением федеральной службы по надзору
в сфере связи, информационных технологий
и массовых коммуникаций по Тюменской
области, ХМАО-Югре и ЯНАО
19 апреля 2012 года
Регистрационный ПИ № ТУ72-00558

Тираж 1300 Заказ 161 тз
Подписные индексы:
на год – ПА700, на полугодие – ПР561

№ 18 (1321)

Газета вышла в свет 2 мая 2026г.

Подписано в печать 30 апреля 2026г.

по графику: 16.00

фактически: 16.00

Газета выходит по субботам

Цена годовой подписки 88 руб.,
в розницу не распространяется

Издатель

Департамент внутренней политики ЯНАО
(629008, ЯНАО, г.Салехард,
пр-кт Молодёжи, д. 9, каб. 708)

Отпечатано в АНО «Ямал-Медиа»

Юридический адрес: 629003, Ямало-
Ненецкий автономный округ, г. Салехард,
мкр. Богдана Кнуянца, д. 1, каб. 106

Фактический адрес: 629007, Ямало-
Ненецкий автономный округ, г. Салехард,
ул. Чубынина, д. 39А

Генеральный

директор

АНО «Ямал-Медиа»

Зулинова

Марья Андреевна

Главный редактор

Яковлева

Алина Кирилловна